

فريق التفريغ بموقع الطريق إلى الله
يقدم

اليوم الثاني من "سلسلة الطريق إلى القرآن"

(باللهجة المصرية)

لفضيلة الشيخ: الدكتور / حازم شومان

رابط المادة : <https://way2allah.com/khotab-item-113.htm>



السلام عليكم ورحمة الله وبركاته، الحمد لله وكفى وصلاة وسلاما على عباده الذين اصطفى، ثم أما بعد، يعني حد قرأ الجزء الثاني يا جماعة قبل ما يجي؟ كلكم قريتوا الجزء الثاني قبل ما تيجوا؟ خدوا بالكم الجزء بتاع النهاردة دسم شوية، مليون حاجات فكرية، وفي حاجات منقدرش إن إحنا نعديها حتى ولو كانت صعبة، لأن مهم جدا إن إحنا نسمعها ونفهمها الليلة يا جماعة أو النهاردة، الليلة أو اليوم ماتفقناش لسنة بعد العصر تبع الليلة ولا تبع اليوم، الله المستعان، طب عملتوا إيه في الجزء بتاع إمبراح؟ يعني فرقت شوية وإحنا بنصلي التراويح بيه؟ فرقت، الحمد لله والشكر لله قال تعالى: **"كَلَّا بَلْ رَانَ عَلَى قُلُوبِهِمْ مَا كَانُوا يَكْسِبُونَ"** المطففين: ١٤ الشهوات والمعاصي والغفلة، حب الدنيا، عملت طبقة حوالين القلب، اللي هيا طبقة الران، الآية اللي بعدها **"كَلَّا إِنَّهُمْ عَنْ رَبِّهِمْ يَوْمِئِذٍ لَمَحْجُوبُونَ"** المطففين: ١٥ لما الران أو المعاصي أو الشهوات عملت حجاب حوالين القلب، منعه عن الإتصال بالله في الدنيا، يوم القيامة عوقبوا إن لا ينظروا إلى الله، إن فيه حجاب بينهم وبين الله في الآخرة

واخدين بالكوا يا جماعة يعني الشهوات اللي حوالين قلوبنا دي ممكن تؤدي إن إحنا نحرم من النظر إلى وجه الله في الآخرة، وهو ده أعظم حلم لنا في حياتنا، يبقى هدف السلسلة بتاعة التفسير إن حجاب الشهوات اللي منع اتصال قلوبنا بالله نبدأ نزيله من خلال كلام الله سبحانه وتعالى عشان قلوبنا تتصل بالله سبحانه وتعالى، عايزين الكلمة اللي ربنا سبحانه وتعالى أوحى بيها لرسول الله صلى الله عليه وسلم في القرآن **"لَا تُحْرِكْ بِهِ لِسَانَكَ لِتَعْجَلَ بِهِ"** القيامة: ١٦ تبقى هيا الشعار بتاعنا في رمضان يا جماعة، لا تحركوا به ألسنتكم لتعجلوا به

يا جماعة إحنا عايزين نفهم القرآن مش المقصد إن أنا أقرأ ٥ أجزاء ... لا، المقصد إن أنا أعيش عشان كدة، قولنا كل يوم لجزء، نعيش مع الجزء ده، عشان بإذن الله معانيه تدخل في قلوبنا، يعني بيقولك إن الأحجار الكريمة اللي زي الزمرد وزى الماس لا تصنع، محدش يقدر يصنعها، ولكنها نبحت عنها حتى نجدها ونحافظ عليها، أهو إحنا دلوقتي بندور على الأحجار الكريمة، اللي ربنا نزلها لنا من فوق سبع سماوات، بندور على معاني كتاب الله سبحانه وتعالى

هنكلم بإذن الله سبحانه وتعالى في هذا الدرس عن الجزء الثاني من سورة البقرة، الجزء الثاني من سورة البقرة من أول **"سَيَقُولُ السُّفَهَاءُ مِنَ النَّاسِ مَا وَلَاهُمْ عَنْ قِبَلَتِهِمْ الَّتِي كَانُوا عَلَيْهَا قُلْ لِلَّهِ الْمَشْرِقُ وَالْمَغْرِبُ يَهْدِي مَنْ يَشَاءُ إِلَى صِرَاطٍ مُسْتَقِيمٍ"** البقرة: ١٤٢ الجزء الثاني قولنا إنه بيكلم عن الأحكام اللي ربنا إبتلانا بيها، اللي إحنا مطالبين إن إحنا نسمع ونطيع فيها، الجزء الأول كان فيه سيدنا ءادم **"وَعَصَى آدَمُ رَبَّهُ فَغَوَى * ثُمَّ اجْتَبَاهُ رَبُّهُ فَتَابَ عَلَيْهِ وَهَدَى"** طه ١٢١: ١٢٢ وكان فيه قصة بنى اسرائيل اللي عصوا تمام المعصية، وكان فيه قصه إبراهيم اللي أطاع تمام الطاعة **"فَأَتَمَّهُنَّ"**، وربنا أعطانا التكليف دي وكأنه قال لنا هتبقوا تبع أهى نموذج من النماذج الثلاثة؟ لو اتبعنا نموذج إبراهيم عليه الصلاة والسلام لنا ٣ حاجات من عند الله لهذه الامة :

١. ألا يؤاخذنا الله إن نسينا أو أخطئنا

٢. ألا يحمل علينا الله إصرا كما حمله على الذين من قبلنا، ما فيش عقوبات تنزل علينا
 ٣. ألا يحملنا الله مالا طاقه لنا به
 الثلاثة دول لنا وليك فرديا وللمجتمع لو إحنا سمعنا واطعنا

تحويل القبلة والحكمة منه

الجزء الثاني بيكلم عن الأحكام يا جماعة، جزء الأحكام ده عامل مشاكل كتيرة جدا عند المستشرقين طبعاً مش عند أهل اليقين، عشان كدة الدرس بتاع المرادى درس فهم، عايزين نفهم عظمه تشريع الإسلام، الجزء ده خمس أسواط، اللي إحنا حنكلم عليه الليلة، الشوط الأول اللي بيكلم عن تحويل القبلة من بيت المقدس إلى الكعبة، بيبدأ من أول قول الله "سَيَقُولُ السُّفَهَاءُ مِنَ النَّاسِ مَا وَلَّاهُمْ عَن قِبَلَتِهِمُ الَّتِي كَانُوا عَلَيْهَا قُلْ لِلَّهِ الْمَشْرِقُ وَالْمَغْرِبُ يَهْدِي مَنْ يَشَاءُ إِلَى صِرَاطٍ مُسْتَقِيمٍ" البقرة : ١٤٢

وبينتهى فى قول الله سبحانه وتعالى : " لَيْسَ الْبِرُّ أَنْ تُولُّوا وُجُوهَكُمْ قِبَلَ الْمَشْرِقِ وَالْمَغْرِبِ وَلَكِنَّ الْبِرَّ مَنْ آمَنَ بِاللَّهِ وَالْيَوْمِ الْآخِرِ وَالْمَلَائِكَةِ وَالْكِتَابِ وَالنَّبِيِّينَ وَآتَى الْمَالَ عَلَى حُبِّهِ ذَوِي الْقُرْبَىٰ وَالْيَتَامَىٰ وَالْمَسَاكِينَ وَابْنَ السَّبِيلِ وَالسَّائِلِينَ وَفِي الرِّقَابِ وَأَقَامَ الصَّلَاةَ وَآتَى الزَّكَاةَ وَالْمُوفُونَ بِعَهْدِهِمْ إِذَا عَاهَدُوا وَالصَّابِرِينَ فِي الْبَأْسَاءِ وَالضَّرَّاءِ وَحِينَ الْبَأْسِ أُولَئِكَ الَّذِينَ صَدَقُوا وَأُولَئِكَ هُمُ الْمُتَّقُونَ" البقرة : ١٧٧ طب ليه أول تكليف نزل تحويل القبلة؟ عشان التميز، عشان نبقى أمة مميزة، لازم نبقى مميزين، لازم إحنا كملتزمين الوقتي مميزين يا جماعة، لازم إن نتميز حتى عن الناس اللي فى المجتمع الإسلامى ولكن غير ملتزمين، ليه؟ عشان سورة الدين تظهر، إحنا اللي هنظهر سورة الدين، لو عظمة الدين مظهرتش فى سلوكيتنا وأخلاقنا ونور الإيمان اللي على وشنا وجهد الدعوة والتضحية اللي إحنا بنبدله، لو عظمة الدين مظهرتش فينا مش هتظهر، يبقى إذا لازم نتميز، فأول حكم كان حكم التميز، بقت لنا قبلتنا المميزة عن باقى الأديان وأصبحنا من أول هذا الوقت بقينا أمة مميزة عن باقى الأمم

طب يارب إحنا قعدنا ١٧ شهر نصلى فى بيت المقدس ليه؟ طب مكان من أوها نصلى للكعبة وخلص قال تعالى : "وَمَا جَعَلْنَا الْقِبْلَةَ الَّتِي كُنْتَ عَلَيْهَا إِلَّا لِنَعْلَمَ مَن يَتَّبِعِ الرَّسُولَ مِمَّن يَنْقَلِبْ عَلَىٰ عَقْبَيْهِ وَإِنْ كَانَتْ لَكَبِيرَةً إِلَّا عَلَى الَّذِينَ هَدَى اللَّهُ وَمَا كَانَ اللَّهُ لِيُضِلَّ إِيْمَانَكُمْ إِنَّ اللَّهَ بِالنَّاسِ لَرُؤُوفٌ رَّحِيمٌ" البقرة : ١٤٣ "يَتَّبِعُ" الكلمه دى كلمه نعلقها كدة قدامنا، نعلقها فى قلوبنا "إِلَّا لِنَعْلَمَ مَن يَتَّبِعُ" ربنا يريد أنه يعلم مين اللي هيتبع؟ ومين لما يجى التكليف صعب عليه هيقع وهيسبب التكاليف الدينية؟ يا جماعة "وَإِنْ كَانَتْ لَكَبِيرَةً إِلَّا عَلَى الَّذِينَ هَدَى اللَّهُ" يعنى دلوقتى فيه تكاليف كتيرة جدا يجى الشاب مش قادر أطبقها، أو الأخت تقولك أنا مش قادرة أطبقها، اوعى تقول أمام أى تكليف ربنا أمرك بيه مش قادر ولكن قل سمعنا واطعنا، وتحاول أنك تنفذ منه ما استطعت، يبقى كانت دى امتحان لمدى ثبات المسلم على تكاليف ربنا، حتى لو صعب عليك، أى حكم من أحكام الدين حتى لو سنة سمعتها مهما كان صعب عليك جاهد عشان تنفذه، اوعى تقول فيه تكليف من تكاليف ربنا صعب ابدا

الدين مظهر وجوهر معا

والآية اللي ربنا ختم بيها شوط تحويل القبلة "لَيْسَ الْبِرُّ أَنْ تُولُّوا وُجُوهَكُمْ قِبَلَ الْمَشْرِقِ وَالْمَغْرِبِ" الآية دى مهمة جدا يا جماعة، تلت أربع صفحات ربنا سبحانه وتعالى بيجادل أى معارض فى مسألة تحويل القبلة، وبعد كدة فى الآخر كأنه

يقول البر مش إنك انت تبص ناحيه اليمين أو تتوجه ناحيه الشمال، ولا إنك تتوجه ناحيه الكعبة ولا بيت المقدس، خدوا بالكم يا جماعة ده عشان ربنا يعرفنا إن الدين مش شكليات، أيوة التوجه ناحيه الكعبة هو الحق، وأيوة هنكافح من أجله، وأيوة هنجادل من أجله، وأيوة هندعو إليه وهنفذه، ولكن أوعى تفكر دى شكليات الدين هو المعانى الايمانية اللي وراء هذه السلوكيات

يعنى بعض الناس مثلا من ضمن سلوكياتها إنه اول ما يشوف الشاب الجديد لازم تربي دقنك، اه الدين هوا ده وأول ما الشاب يربي دقته ماعدش يكلمه خلاص، ليه؟ انت بقيت ملتزم وبقيت شيخ يا بنى، يا جماعة اللحية من الدين واللحية من أهم امور الدين، وهنكلم عن اللحية حتى لو كنا فى السلاب هنكلم فى اللحية، ولكن الدين مش لحية، ولكن الدين مش الجلبيه القصيرة، الدين مشاعر فى القلب، مشاعر معرفة الله عز وجل، ومشاعر هم الآخره، ومفاهيم فى الفكر، مفاهيم الدين الواسعة فى القرآن والسنة وسلوكيات فى الجوارح، سلوكيات العبادة، سلوكيات الجهاد، وسلوكيات الدعوة

ومن ضمن السلوكيات "الهدى الظاهر" اللي من ضمنه اللحية والجلبيه القصيرة، يعنى أنا عايز أقول إيه؟ **عايز أقول إن إحنا عايزين نبقى فى الدين بنبص للجوهر زى ما بنبص فى المظهر، عايزين نبقى ناس عمقين فى تناول الإسلام الإسلام أعظم دين فى الوجود كله، مافيش حكم من أحكام الإسلام لو أى مفكر غربى سمع الحكمة اللي وراء هذا الحكم هينبهر وهيدخل فى هذا الدين، ولكن إحنا بنعد نتشاكل مع الناس عشان أحكام وظاهر الأحكام وننسى جوهر الأحكام وحكمة الأحكام وعلة الأحكام، يبقى لازم الأثنين، لا دى لواحدنا ولا دى لواحدنا، لازم نهتم بالظاهر ونهتم بالباطن**

كل شوط وحكمة

الشوط الأولانى : شوط تحويل القبلة الشوط الثانى بيبدأ بعد شوط تحويل القبلة، تحويل القبلة خدت ربعين بالضبط الشوط الثانى والثالث والرابع الترتيب بتاعهم إيه؟ كل شوط منهم عبارة عن عبادة من العبادات، معاها أحكام من أحكام الشريعة

الشوط الثانى : بيبدأ من "يا أَيُّهَا الَّذِينَ آمَنُوا كُتِبَ عَلَيْكُمُ الْقِصَاصُ فِي الْقَتْلَى" البقرة : ١٧٨ أحكام الدم، وبعد كدة "كُتِبَ عَلَيْكُمُ إِذَا حَضَرَ أَحَدَكُمُ الْمَوْتُ إِنْ تَرَكَ خَيْرًا الْوَصِيَّةُ لِلْوَالِدَيْنِ وَالْأَقْرَبِينَ بِالْمَعْرُوفِ حَقًّا عَلَى الْمُتَّقِينَ" البقرة : ١٨٠ أحكام الوصيه والميراث، اللي هيا أحكام المال، يبقى أحكام الدم والمال اللي هما أكثر حاجات الناس بتظلم بعض وتقطع بعض عشاها

وبعد كدة العبادة اللي جت بعدهم الصيام "يا أَيُّهَا الَّذِينَ آمَنُوا كُتِبَ عَلَيْكُمُ الصِّيَامُ كَمَا كُتِبَ عَلَى الَّذِينَ مِنْ قَبْلِكُمْ لَعَلَّكُمْ تَتَّقُونَ" البقرة : ١٨٣ بتيجى آيات الصيام، وقبل ما ينتهى الشوط بعد ما بتخلص آيات الصيام بنلاقى حكم الرشوة، الرشوة اللي ربنا بيقول "وَلَا تَأْكُلُوا أَمْوَالَكُمْ بَيْنَكُمْ بِالْبَاطِلِ وَتُدْلُوا بِهَا إِلَى الْحُكَّامِ لِتَأْكُلُوا فَرِيقًا مِنْ أَمْوَالِ النَّاسِ بِالْإِثْمِ وَأَنْتُمْ تَعْلَمُونَ" العلماء بيقولوا دى الرشوة، تحريم الرشوة، بيقعة شوط الصيام اللي هوا الشوط الثانى فيه عبادة الصيام وفيه أحكام الدم والمال والرشوة

الشوط الثالث : برضه عبادة وأحكام، إيه العبادة اللي فيه؟ "يَسْأَلُونَكَ عَنِ الْأَهْلِ قُلْ هِيَ مَوَاقِيتُ لِلنَّاسِ وَالْحَجِّ وَلَيْسَ الْبِرُّ بِأَنْ تَأْتُوا الْبُيُوتَ مِنْ ظُهُورِهَا وَلَكِنَّ الْبِرَّ مَنِ اتَّقَى وَأَتُوا الْبُيُوتَ مِنْ أَبْوَابِهَا وَاتَّقُوا اللَّهَ لَعَلَّكُمْ تُفْلِحُونَ " البقرة : ١٨٩ يبقى عبادة الحج، ومع عبادة الحج أحكام القتال "وَقَاتِلُوا فِي سَبِيلِ اللَّهِ الَّذِينَ يُفَاتِنُونَكُمْ وَلَا تَعْتَدُوا إِنَّ اللَّهَ لَا يُحِبُّ الْمُعْتَدِينَ " البقرة : ١٩٠ " كُتِبَ عَلَيْكُمُ الْقِتَالُ وَهُوَ كُرْهٌ لَكُمْ وَعَسَى أَنْ تَكْرَهُوا شَيْئًا وَهُوَ خَيْرٌ لَكُمْ وَعَسَى أَنْ تُحِبُّوا شَيْئًا وَهُوَ شَرٌّ لَكُمْ وَاللَّهُ يَعْلَمُ وَأَنْتُمْ لَا تَعْلَمُونَ " البقرة : ٢١٦ يبقى الشوط الثالث بيتكلم عن عباده الحج وأحكام القتال وأحكام الجهاد، وينتهي بقول الله تعالى : "إِنَّ الَّذِينَ آمَنُوا وَالَّذِينَ هَاجَرُوا وَجَاهَدُوا فِي سَبِيلِ اللَّهِ أُولَئِكَ يَرْجُونَ رَحْمَتَ اللَّهِ وَاللَّهُ غَفُورٌ رَحِيمٌ" البقرة : ٢١٨

الشوط الرابع : بيبدأ بعدها فوراً، العبادة اللي فيه عبادة إيه؟ الصلاة "حَافِظُوا عَلَى الصَّلَوَاتِ وَالصَّلَاةِ الْوُسْطَى وَقُومُوا لِلَّهِ قَانِتِينَ" البقرة : ٢٣٨ الكلام اللي إحنا بنقوله ده يا جماعة يعني كثير من الناس تحير فيه حيرة شديدة جداً، بعد ما نقول ال ٥ أشواط هقولكم الشبهات اللي تقالت في الكلام ده عشان نعرف أد إيه إن كل شبهة إتقالت قدام ديننا ما هي إلا معجزة من معجزات الإسلام ومعجزة من معجزات القرآن، بس نفهم، إحنا مشكلتنا الأساسية الفهم، الخلل الأساسي اللي بيعاني منه المسلمين الآن ليس خلل الإيمان فقط، ولكن خلل الفهم، خلل العقلية إحنا علاقتنا بالقرآن اتقطعت فالقرآن مصدر الفهم فالفهم بتاعنا ضعف

الشوط الرابع اللي إحنا قولنا فيه عبادة الصلاة "حَافِظُوا عَلَى الصَّلَوَاتِ وَالصَّلَاةِ الْوُسْطَى وَقُومُوا لِلَّهِ قَانِتِينَ" الأحكام بتاعته من أول قول الله تعالى "يَسْأَلُونَكَ عَنِ الْخَمْرِ وَالْمَيْسِرِ قُلْ فِيهِمَا إِثْمٌ كَبِيرٌ وَمَنَافِعُ لِلنَّاسِ وَإِثْمُهُمَا أَكْبَرُ مِنْ نَفْعِهِمَا وَيَسْأَلُونَكَ مَاذَا يُنْفِقُونَ قُلِ الْعَفْوَ كَذَلِكَ يُبَيِّنُ اللَّهُ لَكُمْ الْآيَاتِ لَعَلَّكُمْ تَتَفَكَّرُونَ " البقرة : ٢١٩ أحكام الخمر والميسر، وبعد كدة "وَيَسْأَلُونَكَ عَنِ الْيَتَامَى قُلْ إِصْلَاحٌ لَهُمْ خَيْرٌ وَإِنْ تُخَالطُوهُمْ فَاخْوَانُكُمْ وَاللَّهُ يَعْلَمُ الْمُفْسِدَ مِنَ الْمُصْلِحِ وَلَوْ شَاءَ اللَّهُ لَأَعْتَبْتُمْ إِنْ اللَّهَ عَزِيزٌ حَكِيمٌ " البقرة : ٢٢٠ أحكام اليتامى و بعد كدة إن شاب مسلم عايز يجوز من واحدة مشرقة أو بنت مسلمة متقدم لها واحد مشرك، وبعد كدة أحكام الجماع، وبعد كدة أحكام الطلاق، والطلاق هياخذ منا ربعين كاملين وفي وسطهم آية الصلاة، وبينتهي هذا الشوط الرابع بهذا الأمر

الشوط الخامس : بيبدأ بقصة داود وجالوت وطالوت، فاكرين لما شرحناها في شريط "الإسلام يستغيث" شرحنا هذه القصة من أول قول الله سبحانه وتعالى "أَلَمْ تَرَ إِلَى الْمَلِئِكِ مِنْ بَنِي إِسْرَائِيلَ مِنْ بَعْدِ مُوسَى إِذْ قَالُوا لِنَبِيِّ هُمْ ابْعَثْ لَنَا مَلِكًا نُقَاتِلْ فِي سَبِيلِ اللَّهِ " البقرة : ٢٤٦ صفحتين كاملين الجهاد، قالوا عايزين نجاهد ولما فرض عليهم الجهاد إزاي معظمهم وقع، ولما قابلتهم فتنة الدنيا وهما رايجين يجاهدوا في سبيل الله إزاي معظم الباقين كمان وقعوا، وإزاي الجيش الثاني كان جيش عظيم وهما عدد قليل ولكن الله بقرته نصرهم على يد سيدنا داود ثم اصطفى داود بعد هذا، قصة الجهاد بعد قصة الجهاد بتبدأ آيات الإنفاق من أول قول الله "يَا أَيُّهَا الَّذِينَ آمَنُوا أَنْفِقُوا مِمَّا رَزَقْنَاكُمْ مِمَّنْ قَبْلِ أَنْ يَأْتِيَكُمْ يَوْمٌ لَا بَيْعَ فِيهِ وَلَا خُلَّةَ وَلَا شَفَاعَةَ وَالْكَافِرُونَ هُمُ الظَّالِمُونَ " البقرة : ٢٥٤ آيات الإنفاق بتاخذ ربعين كاملين، ربنا بيدعونا فيها إلى الإنفاق وختامها "الَّذِينَ يُنْفِقُونَ أَمْوَالَهُمْ بِاللَّيْلِ وَالنَّهَارِ سِرًّا وَعَلاَنِيَةً فَلَهُمْ أَجْرُهُمْ عِنْدَ رَبِّهِمْ وَلَا خَوْفٌ عَلَيْهِمْ وَلَا هُمْ يَحْزَنُونَ" البقرة : ٢٧٤

أول مبتخلص آيات الإنفاق تبدأ آيات الربا "الَّذِينَ يَأْكُلُونَ الرِّبَا لَا يَقُومُونَ إِلَّا كَمَا يَقُومُ الَّذِي يَتَخَبَّطُهُ الشَّيْطَانُ مِنَ الْمَسِّ ذَلِكَ بِأَنَّهُمْ قَالُوا إِنَّمَا الْبَيْعُ مِثْلُ الرِّبَا وَأَحَلَّ اللَّهُ الْبَيْعَ وَحَرَّمَ الرِّبَا فَمَنْ جَاءَهُ مَوْعِظَةٌ مِنْ رَبِّهِ فَانْتَهَى فَلَهُ مَا سَلَفَ وَأَمْرُهُ إِلَى اللَّهِ وَمَنْ عَادَ فَأُولَئِكَ أَصْحَابُ النَّارِ هُمْ فِيهَا خَالِدُونَ" البقرة : ٢٧٥

أول ما بتبدأ آيات الربا تبدأ أحكام الدين، أحكام المداينة "يا أَيُّهَا الَّذِينَ آمَنُوا إِذَا تَدَايَنْتُمْ بِدِينٍ إِلَى أَجَلٍ مُسَمًّى فَاكْتُبُوهُ وَلْيَكْتُب بَيْنَكُمْ كَاتِبٌ بِالْعَدْلِ وَلَا يُأْبَ كَاتِبٌ أَنْ يَكْتُبَ كَمَا عَلَّمَهُ اللَّهُ فَلْيَكْتُبْ وَلْيُمْلِلِ الَّذِي عَلَيْهِ الْحَقُّ وَلْيَتَّقِ اللَّهَ رَبَّهُ وَلَا يَبْخَسَ مِنْهُ شَيْئًا فَإِنْ كَانَ الَّذِي عَلَيْهِ الْحَقُّ سَفِيهًا أَوْ ضَعِيفًا أَوْ لَا يَسْتَطِيعُ أَنْ يُمِلَّ هُوَ فَلْيُمْلِلْ وَلِيُّهُ بِالْعَدْلِ وَاسْتَشْهِدُوا شَهِيدَيْنِ مِنْ رِجَالِكُمْ فَإِنْ لَمْ يَكُونَا رَجُلَيْنِ فَرَجُلٌ وَامْرَأَتَانِ مِمَّن تَرْضَوْنَ مِنَ الشُّهَدَاءِ أَنْ تَضِلَّ إِحْدَاهُمَا فَتُذَكِّرَ إِحْدَاهُمَا الْأُخْرَى وَلَا يُأْبَ الشُّهَدَاءُ إِذَا مَا دُعُوا وَلَا تَسْأَمُوا أَنْ تَكْتُبُوهُ صَغِيرًا أَوْ كَبِيرًا إِلَى أَجَلِهِ ذَلِكَمْ أَقْسَطُ عِنْدَ اللَّهِ وَأَقْوَمٌ لِلشَّهَادَةِ وَأَدْنَى أَلَّا تَرْتَابُوا إِلَّا أَنْ تَكُونَ تِجَارَةً حَاضِرَةً تُدِيرُونَهَا بَيْنَكُمْ فَلَيْسَ عَلَيْكُمْ جُنَاحٌ أَلَّا تَكْتُبُوهَا وَأَشْهِدُوا إِذَا تَبَايَعْتُمْ وَلَا يُضَارَّ كَاتِبٌ وَلَا شَهِيدٌ وَإِنْ تَفَعَّلُوا فَإِنَّهُ فَسُوقٌ بِكُمْ وَاتَّقُوا اللَّهَ وَيُعَلِّمُكُمُ اللَّهُ وَاللَّهُ بِكُلِّ شَيْءٍ عَلِيمٌ"

البقرة : ٢٨٢ ويخلص الشوط بتاع الأحكام عشان تيجى الخاتمة بتاعة السورة، طب يارب ليه آخر السورة - آخر أحكام جبتها - أحكام الدين وأحكام الربا، التعاملات المادية، ليه يارب هي آخر أحكام؟ مجبتهاش في الأول ليه قبل أحكام الطلاق وأحكام الخمر والميسر؟ ليه؟ لأن آخر حكم الواحد من البشر مستعد أنه يسمع ويطيع أحكام الله فيه أحكام المال، آخر حاجة بتخرج من قلبك حب المال، عشان كدة ربنا جابها في آخر التريبة خالص أما نكون اتربينا على السورة تيجى أحكام المال في الآخر، ده يدل على إن حب المال متاصل في قلب الانسان اد ايه !

طب ليه قصه جالوت وطالوت اللي بتكلم عن الجهاد جت بعدها آيات الإنفاق؟ لأن لا يمكن جهاد بدون إنفاق، الجهاد عايز مال، عشان كدة كثيرا ما كان الله سبحانه وتعالى يقول إن إحنا نجاهد بأموالنا وأنفسنا، بالمال قبل النفس؟ آه، إمال اللي بيحاربوا اليهود واللى بيحاربوا الأمريكان الناس دى هتجيب فلوس منين؟ مهما الرجالة أهم هناك بس هما عايزين فلوس، إذا الإنفاق بيجى بعديه الجهاد لإرتباط الأثنين مع بعضهما

بعد مقولنا ال ٥ أشواط دول المستشرقين مش عاجبهم الكلام ده، مش عاجبكم الكلام ده ليه؟ أعداء هذا الدين مش عاجبهم الكلام ده، مش عاجبهم كلام ربنا سبحانه وتعالى ليه!! يقولك أول حاجة إيه الترابط ما بين الكلام ده؟ ده أنا أدخل في آية صوم أطلع منها على آية رشوة الأقى نفسى دخلت في جهاد أطلع من الجهاد الأقى نفسى بحج أطلع من الحج، هوا إيه الكلام اللي مالوش علاقة ببعضه؟ يا جماعة ده هذا الكلام فيه بينه وبين بعضه ترابط عظيم ، لو تلاحظ وإحنا بنقول الأشواط إن الأحكام وسطها ربنا بيحجب العبادات، طب ليه يارب بتجيب العبادات وسط الأحكام؟ أول حاجة عشان ربنا سبحانه وتعالى يعرفنا إن العبادات هي الزاد الإيمانى اللي إحنا بنستعين بيه على تطبيق الأحكام، إزاي؟ مهوا أنا الوقتى لو جيت أقول لك صلى وإنت مبتصليش، أنا مش قادر أصلى، طب كلمتك كلمتين عن الجنة والنار هيحصل إيه؟ قلبك هيرق تقوم قايم تصلى

يبقى القضية يا جماعة لو إحنا قلوبنا بقت قلوب خصبة أى بذرة أمر ونهى هترمى فيها هتنتب منها نبتة الإمثال، القضية يا جماعة قضية قلوب، قلبى وقلبك، القضية لو قلوبنا كويسة هنقدر ننفذ أوامر ربنا، الأوامر اللي إنت مش

قادر تنفيذها لغاية الوقتى والمعاصى اللى إنت لغاية الوقتى بتقع فيها، سببها الأساسى إن قلبك لسه مهواش كويس، أصلح قلبى إزاي؟ بالعبادات، يبقى دى أول رسالة

دينا دين شامل

الرساله الثانية إن كان ربنا بيقولك هوا ده الدين، الدين دين شمولى، شمولية الإسلام، الدين ما فيش فرق بين الأحكام والعبادات والأخلاق والمعاملات هو ده دين ربنا سبحانه وتعالى، يبقى إحنا زى ما كنا بنشرح فى أول سورة المؤمنون كدة، تلاقى ربنا بيكلمك عن العبادات "قَدْ أَفْلَحَ الْمُؤْمِنُونَ * الَّذِينَ هُمْ فِي صَلَاتِهِمْ خَاشِعُونَ" المؤمنون ١: ٢ وبعد كدة الأخلاق "وَالَّذِينَ هُمْ لِفُرُوجِهِمْ حَافِظُونَ * إِلَّا عَلَىٰ أَزْوَاجِهِمْ أَوْ مَا مَلَكَتْ أَيْمَانُهُمْ فَإِنَّهُمْ غَيْرُ مَلُومِينَ * فَمَنْ ابْتَغَىٰ وَرَاءَ ذَلِكَ فَأُولَٰئِكَ هُمُ الْعَادُونَ" بعد كدة المعاملات "وَالَّذِينَ هُمْ لِأَمَانَاتِهِمْ وَعَهْدِهِمْ رَاعُونَ" المؤمنون ٥: ٨ دين ربنا بيقول ده وحدة واحدة مينفعش إن إحنا نفرق، و هو الدين الوحيد اللى موجود على وجه الأرض الوقتى اللى بيعتبر كل ده وحدة واحدة، اللى بيعتبر مافيش فرق ما بين السياسة وما بين الواقع، الدين كله واحد، ما فيش حاجة اسمها جوة الجامع شيخ وبره الجامع " شيخ منظر " مينفعش الكلام ده، إنت لازم فى الأثنين راجل مستقيم على أمر الله، مافيش حاجة أنا قلبى هنا أبيض قلب خساية بس أنا مبصليش كثير ولا بعبد ربنا كثير، الكلام ده كلام فارغ فى وجه نظر الإسلام أو فى رؤية الإسلام أو فى حكم الإسلام، يبقى تانى حاجة شمولية الدين إن الدين دين شمولى عشان كدة ربنا قال فى سورة البقرة "يَا أَيُّهَا الَّذِينَ آمَنُوا ادْخُلُوا فِي السِّلْمِ كَآفَّةً وَلَا تَتَّبِعُوا خُطُوَاتِ الشَّيْطَانِ إِنَّهُ لَكُمْ عَدُوٌّ مُّبِينٌ" البقرة: ٢٠٨ إدخال فى الإسلام كله، متجلبش حكم فى الإسلام تطبقة وتسبب حكم تانى، متجلبش حاجة سهلة على نفسك أو محبة لنفسك تتبعها وتسبب الحاجة... لأ... أدخل فى الإسلام كله، عبادات، عقائد، معاملات، أخلاق، سلوكيات، أحكام مالية، واقع، دعوة إلى الله، تضحية، بذل، هوا الدين كله، وده برضه من قول الله تعالى فى سورة البقرة "صِبْغَةَ اللَّهِ وَمَنْ أَحْسَنُ مِنَ اللَّهِ صِبْغَةً وَنَحْنُ لَهُ عَابِدُونَ" البقرة: ١٣٨ "قُلْ أَنْتُمْ أَعْلَمُ أَمْ اللَّهُ وَمَنْ أظْلَمُ مِمَّنْ كَتَمَ شَهَادَةً عِنْدَهُ مِنَ اللَّهِ وَمَا اللَّهُ بِغَافِلٍ عَمَّا تَعْمَلُونَ" البقرة: ١٤٠ هنا ربنا شبه الدين بالصبغة اللى لما تنزل على الثوب تصبغه، يبقى لما الدين ينزل عليك يصبغ كل حاجة فيك حتى نومك، اللى يشوفك وإنت نائم يعرف إنك مسلم، الإسلام هو الدين الوحيد اللى يشوف واحد من أتباعه الملتزمين بيه وهو فى الخلاء يعرف إنه مسلم، وهو نائم يعرف إنه مسلم، لأنه ماسبش حاجة مشرعش فيها، شمولية الإسلام

حكمة العبادات والحكمة من ترتيبها

الحاجة الثالثة يا جماعة ودى من الحاجات الجميلة جدا، الحاجات الرائعة إن كل عبادة لو جيت تركز فى الأحكام اللى جت معاها هتنبهر فعلا بالقرآن، إزاي؟ عبادة الصوم، إيه الأحكام اللى جاءت قبلها؟ أحكام الدم والمال وأحكام القصاص وأحكام الوصية فى الورث والحكم اللى جه بعدها حكم الرشوة، كأن ربنا بيقول إنت لما بتصوم بتصوم عن إيه؟ عن ما أحل الله، طب وهو فى إنسان صام عن ما أحل الله يقوم يمد يده لما حرم الله؟! سواء على دم أخوه اللى حرام عليه أو على مال الوارث اللى هوا حق الله فيه، أو على مال وانت رايح فى مصلحة حكومية يقولك الأول هات ٥ جنيه وأنا أقضيلك المصلحة، يبقى الصوم تربيته لينا إن إحنا إذا كنا مامديناش إيدنا على الحلال من باب أولى إننا منمدش إيدنا على الحرام، يبقى الحكم متوافق مع العبادة، طيب والحج جه مع القتال، إيه العلاقة بين الحج والقتال؟ يا

جماعة دى أوثق علاقة، ثم خدوا بالكم عبادة الصوم جت قبل الشوط بتاع الحج والقتال، هو فى علاقه بين الصوم والقتال؟ فيه علاقة؟ هل تعلموا إن السنة اللي فرض فيها رمضان هيا السنة اللي حصل فيها غزوة بدر، يعنى كأن ربنا أعطانا رمضان عشان يبقى عدة على القتال طيب فيه علاقة ما بين الحج والقتال؟ ده هوا الحج أصلا تربية على القتال، إن شاء الله لما نيجى فى سورة الحج بإذن الله سبحانه وتعالى نكلم فى الموضوع ده، الحج أصلا تربية على القتال، هوا إيه الحج؟ الحج إن فيه منطقة كدة على وجه الأرض اللي هي فى مكة، اللي هي الكعبة والصفاء والمروة فيها أعظم حرمت الله على وجه الأرض، فكأن ربنا قالك سيب بلدك وسافر للمكان ده، أعمل إيه يارب؟

تعد تطوف هنا وتسعى هنا وتقف هنا وانت قاعد تذكر الله تذكر ربنا ليه يارب؟ عشان وانت قاعد تذكر ربنا إيمانك بيرتفع فى وسط المكان اللي فيه حرمت الله يقوم يدخل فى قلبك تعظيم حرمت الله، يبقى عبادة الحج أهم ثمرة فيها إيه؟ إنك ترجع وعندك تعظيم لحرمت الله، عشان كدة اللي بيذهب يعمل عمرة أو حج ويجى هنا يشوف بنت متبرجة فى الشارع لو دموعه منزلتش من عينيه من كتر غيرته على انتهاك حرمت الله يبقى محجش صح، يبقى مفهمش أصلا هو رايح يعمل إيه، إنت رايح تعظم حرمت الله "ذَلِكَ وَمَنْ يُعْظِمِ اللَّهَ فَبِأَتْهَا مِنْ تَقْوَى الْقُلُوبِ" الحج: ٣٢، ويعظم حرمت الله، رايح تتدرب على تعظيم حرمت الله، مال الكلام ده بالقتال؟ هو إيه القتال؟ فيه ٢٠ ألف فتاة اغتصبت فى البوسنة هما دول مش حرمت الله؟ فيه بيوت اتهدمت فى فلسطين هيا دى مش حرمت الله؟ المسلممين بيتحاربوا فى العراق هيا دى مش حرمت الله؟ يقوم لما تترى إنك تغير على حرمت الله أول ما تسمع إن فى أى مكان فى الأرض انتهكت فيه حرمت الله تقول ده أنا رقبتي دى تطير بس حرمت الله متنتهكش، يبقى عشان كدة الحج تربية على القتال، عشان كده اللي عايز يربى نفسه على الجهاد يروح يحج خمس ست مرات ويعتمر خمس ست مرات يترى على الجهاد فعلا بحق وحقيقى

طيب الشوط اللي بعد كدة الصلاة جاية وسط آيات الطلاق، ووسط آيات اليتامى، ووسط آيات الزواج من مشركة، والزواج من مشرك، يا جماعة إيه فكرة إن الصلاة جاية وسط الآيات دى؟ أول حكمة إن إحنا نفهم إن العبادة، يعنى أما تلاقى ربنا بيتكلم عن الطلاق "الطَّلَاقُ مَرَّتَانٍ" البقرة: ٢٢٩ وأحكام الطلاق وأحكام اللي يعقد على واحدة يكتب كتابه عليها ويديها مهر وبعد كدة يطلقها ياخذ أد إيه من المهر ويديها أد إيه؟ تلاقى فجأة "حَافِظُوا عَلَى الصَّلَوَاتِ وَالصَّلَاةِ الْوَسْطَى وَقُومُوا لِلَّهِ قَانِتِينَ* فَإِنْ خِفْتُمْ فَرِجَالًا أَوْ رُكْبَانًا" البقرة: ٢٣٨: ٢٣٩ حتى لو خفت تصلى وانت واقف تصلى وانت راكب على الدابة بتاعتك، إنما متسبش الصلاة أبدا "فَإِذَا أَمِنْتُمْ فَأَدْكُرُوا اللَّهَ" افتحوا فى ذكر الله وفى الصلاة "كَمَا عَلَّمَكُم مَّا لَمْ تَكُونُوا تَعْلَمُونَ" البقرة: ٢٣٩ ويرجع لآيات الطلاق، طب ليه؟ كأن ربنا بيقول لك إنهم حاجة واحدة وكأن ربنا بيقول لك إن سبب الظلم فى المحاكم الشرعية اللي فى ٢ مليون قضية طلاق أنا متأكد إن إحنا لو عملنا إحصائية فى ال ٢ مليون قضية طلاق هنلاقي ٩٠% مبيصلوش أصلا، لأن الإنسان اللي بيصلى تلاقيه إنسان بيخاف من ربنا، إنما تلاقى البنت رافعة عليه ٢٠ قضية، ليه يا بنتى؟ لازم أطلععه ومحتوش ولا مليم، والراجل مش راضى إنه يطلقها، ليه يا بنتى؟ لازم أخليها زى البيت الوقف لا هى متجوزة ولا هى مطلقة، ده هوا الكلام اللي

بيتقال بالضبط يا جماعة، طب ليه الظلم ده؟ ما فيش تربية إيمانية أصلاً، ما فيش دين، ما فيش خوف من ربنا، ما فيش تقوى اللي بتيجي من خيرها العبادات، ما فيش عبادة فهذا هو السبب في الظلم الجارى

طيب إيه العلاقة بين الصلاة وبين هذه الأحكام؟ الصلاة يا جماعة صلة بين العبد وربيه صح؟ وكذلك صلة بين العبد والعبد، إحنا دايماً بنقول الصلاة صلة بين العبد وبنسى إن إحنا نقول إن الصلاة صلة بين العبد والعبد، ما انا لما آجى اصلى هنا او حتى بصلى فى بيتى بقول فى التحيات إيه؟ السلام علينا وعلى عباد الله الصالحين، طب لما بقول السلام علينا وعلى عباد الله الصالحين هحسد أخويا اللي بيصلى جنبى؟! هشتم أخويا اللي بيصلى جنبى؟! هفتري على أخويا اللي بيصلى جنبى؟! هظلم أخويا اللي بيصلى جنبى؟! مش هيحصل يبقى إذا الصلاة صلة بين العبد وبين العبد كمان، فربنا جاب مع الصلاة الأحكام التي فيها فراق الطلاق، الطلاق فيه فراق ولا فيه صلة؟ فراق، طيب اليتيم اللي ما فيش حد بيعمل له حاجة وما فيش حد بيضطرب عليه ويأكله ليه؟ أصل واحد ممكن يضطرب عليك ويحترمك ليه؟ أل هو عارف إن أبوك مركزه كبير فعازي يراضى أبوك إنما اللي مالوش أب، اللي أبوه مات ممكن تلاقي ما فيش حد بيعمل له حاجة، يبقى كده إحنا بنستأصل هذا الإنسان من المجتمع إزاي؟! طيب لما مسلم يسب المسلمة ويروح يجوز بواحدة مشركة طب ما ده كده إحنا بنمزق المجتمع ده فيه فراق، طب الخمر والميسر مهو فيه تفرقة لأواصر الأسرة، كل دى أحكام فيها فراق، فالصلاة العبادة اللي توصل المجتمع كله ببعضه من خلال رابطة إيمانية، فتيجي وسط الأحكام اللي فيها فراق وفيها إنتزاع عشان تؤكد هذا المعنى، إحنا لو العبادة دى عندنا كويسة هيؤدى هذا إن إحنا فعلاً هنبقى مجتمع متماسك مترابط

يبقى يا جماعة العبادات فيه علاقة وثيقة بينها وبين الأحكام؟ آه، يعنى الكلام ده مش كلام كدة؟ لا الكلام ده مش كلام كدة يا جماعة ده كلام ربنا، طيب يا عم الحج يا عم الشيخ خلاص عازي تقول إن فيه ترابط؟ ايوة فيه ترابط، بس أنا عازي أقول إيه الترتيب؟ أدونا حكمة للترتيب؟ لو تلاحظوا يا جماعة إن الترتيب هنا له حكمة عظيمة جداً، ربنا جاب أحكام المال والربا والمدائنة فى الآخر والا فى الأول؟ فى الآخر، وأحكام الإنفاق كل دى أحكام المال أحكام الإقتصاد فى الآخر، والأحكام التي جت فى الأول أحكام إيه؟ أحكام الرشوة، أحكام الطلاق، أحكام المال و الدم اللي هيا تشريعات إجتماعية، اللي هي مشاكل المجتمع

التار ده مشكلة مصيبة، التار ده كان ممكن يخلى قبيلتين يقضوا على بعض، الميراث ممكن يخلى الإخوات محدش يقول للتانى سلاموا عليكموا طول العمر، أبويا ظلمنى وإداني ومدانيش يقطع الأواصر، يبقى إذا التشريعات اللي جت فى الأول التشريعات الإجتماعية، الإصلاح الإجتماعى، وبعد كدة التشريعات الإقتصادية، الإصلاح الإقتصادى عشان لما نسمع الوقتى فى الجرايد إن قوة الأمم بتقاس بالإقتصاد ده كلام فارغ، أما نسمع الوقتى فى الجرايد إن قوة الدولة عن طريق إن إحنا نمدين الإقتصاد ده كلام فارغ، أول إصلاح بعد الإصلاح الدينى والإيمانى الإصلاح الإجتماعى، المشاكل بتاعة المطلقات ٢ مليون مطلقة ده، دى هتعمل إيه دى؟ إذا كان اللي مش مطلقة مبتتجوزش إمال دى هتعمل فيها إيه؟ إمال المطلقة هتتصرف إزاي زى ما يقولوا كدة؟ إزاي يا جماعة؟ يبقى إذا المشاكل الإجتماعية الأول لازم تتعالج، ده حكمة القرآن، طيب ترتيب العبادات؟ هتلاقي العبادات بتتطلع من الحاجة الأبسط إلى للحاجة

الأصعب : تحويل القبلة، الصلاة، اللي أصعب من الصلاة الصوم، تلاقي الصوم جه بعد الصلاة، طب الأصعب من الصوم؟ الحج، تلاقي الحج جه بعد الصوم، الترتيب

خدوا بالكم من الحجة دى يا جماعة فى حرب ٦٧ يعنى الوقتى بنحارب اليهود يبقى كان لازم نعبى كل طاقات الدولة من أجل الحرب مع اليهود صح؟ فلازم نرفع شعار نقود بيه الناس من أجل تعبئة الطاقات لحرب اليهود، فرفعوا شعار "لا صوت يعلو فوق صوت المعركة" و اتهمنا برضه مافيش فايده !

طيب بعد كدة كان المفروض حرب الإستنزاف ٦ سنين، لو رفعنا شعار "لا صوت يعلو فوق صوت المعركة" ٦ سنين إن شاء الله الناس هتموت مش هتلاقى تاكل، يبقى لازم شعار تانى يناسب المرحلة، الشعار التانى كان إيه؟ "يد تبني ويد تحمل السلاح" أهو هوا ده الفرق بين سورة البقرة وآل عمران

سورة البقرة تلاقى فيه آيات العبادات وآيات الأحكام بناء المجتمع الدولة بتبني، سنة ٢ هجرية، والأحكام دى بتنزل بعد سنة ٢ هجرية، بعد ١٦ أو ١٧ شهر من الهجرة للمدينة فإحنا لسة الدول بتقوم، ولكن هوا دولة الإسلام كانت بتقوم فى طريق سالك؟ ده كان المنافقين بيهدموا فيها من جوه، والمشركين كل شوية جايبين جيش جاين يحاربوها من برة، واليهود كل شوية يتحالفوا عشان يفتحوا ثغر من ثغور المدينة، يعنى كنا يا جماعة بنحاول الدولة دى تقوم فى وسط

معوقات هائلة للواقع، عشان كدة تلاقى آيات الصوم والعبادة والأحكام وبعد كدة آيات قتال **"وَقَاتِلُوا فِي سَبِيلِ اللَّهِ**

الَّذِينَ يُفَاتِلُونَكُمْ وَلَا تَعْتَدُوا إِنَّ اللَّهَ لَا يُحِبُّ الْمُعْتَدِينَ" البقرة: ١٩٠ **"الشَّهْرُ الْحَرَامُ بِالشَّهْرِ الْحَرَامِ وَالْحُرُمَاتُ قِصَاصٌ فَمَنْ اعْتَدَى عَلَيْكُمْ فَاعْتَدُوا عَلَيْهِ بِمِثْلِ مَا اعْتَدَى عَلَيْكُمْ وَاتَّقُوا اللَّهَ وَاعْلَمُوا أَنَّ اللَّهَ مَعَ الْمُتَّقِينَ"** البقرة: ١٩٤ نلاقى فى

النص آيات طالوت وجالوت، طب إحنا بنبنى الدولة، إحنا مالنا بالجهاد الوقتى؟ نستنفذ طاقنا فى الجهاد ليه؟ إحنا مجبرين، ليه؟ لأن إحنا بنتحارب، يبقى لازم يد تبني ويد تحمل السلاح، الأثنين تلاقيهم ماشين جنب بعض، عشان كدة لما تلاقى آيات القتال وسط آيات الأحكام والعبادات أعرف إن السر فى الوقت الذى كان بتقوم فيه الدولة نفس

الوقت الذى كان بيدافع فيه عن هدف، عن عدم هدم هذا البناء الذى بيقوم، يد تبني ويد تحمل السلاح

لما هنكلم فى سورة آل عمران بكلاية إن شاء سبحانه وتعالى هنكلم عن حاجة تانية، العقيدة فى خطر، ٥٠ قناة قاعدة تشتم فى الإسلام وأمريكا عملة تنزلنا الفرقان الباطل الذى بتاعها، واليهود والنصارى شغالين ٢٤ ساعة شبهاات وبنضرب بالصواريخ، يعنى مش بس بنضرب بالشبهاات وبنضرب بالصواريخ، هيا دى المرحلة بتاعة آل عمران شبهاات رهيبية من المنافقين واليهود وحرب مهولة من المشركين فى أحد، فأصبح الدين نفسه فى خطر العقيدة فى خطر، ماعدتش مجال للبناء الوقتى البناء يجب أن يتوقف لغاية منقدر نواجه هذه المرحلة التى حصلت فى آل عمران، ثم يستمر ويكمل البناء وتستمر المسيرة مرة أخرى فى سورة إيه؟ فى سورة النساء

عشان كدة سورة النساء دى لو انت جبت سورة البقرة وحطيطهم ورا بعض هتحس أصلا إن الأثنين سورة واحدة حتى سورة البقرة آخرها أحكام المال التى هيا أحكام المدينة والربا، وسورة النساء أولها أحكام الموارث أحكام المال، الأثنين نفس الموضوع ونفس الفكرة ونفس البناء ولكن نقف فى النص ليه؟ لأن الأعداء جايبين هاجمين علينا من كل ناحية بجميع رسايل الحرب الممكنة فيجب أن نتوقف، يبقى سورة البقرة يد تبني ويد تحمل السلاح، يعنى إنت عايز تقول إن فيه ترتيب؟ آه، حتى لو فيه ترتيب إيه الرابط؟ الترابط يعنى؟ لا... الرابط، يعنى إيه الرابط؟ يعنى الاحكام دى

الرابط ما بينها إيه؟ فيه رابط ما بينها؟ طب ده أى دستور بتاع أى دولة مبتطبلوش الرابط ما بينها، انتوا بتقولوا الكلام ده كلام ربنا، إدينا الرابط؟ ده فيه رابط عظيم جدا يا جماعة بين الأحكام دى كلها، عارفين هوا إيه؟ أحكام الطلاق تخيلوا قبل أحكام الطلاق أد إيه الظلم اللي كان بيقع على المرأة بسبب رجل راجل سابها، اخبطي راسك فى الحيطه ! طب هصرف منين؟ طب إفرض مافيش حد تجوزنى تانى، لا كان فيه حاجة اسمها نفقة ولا متعة، مكنش الكلام ده كله موجود خالص، مكنش فيه حاجة اسمها حقوق للمرأة لما تطلق فكان فيه ظلم بين للمرأة، يبقى أحكام الطلاق جت من أجل العدل مع المرأة، مع هذا الكائن الضعيف فى المجتمع، طب أحكام الربا؟ تخيلوا قبل الإسلام إنت راجل فقير ومحتاج؟ خلاص ماشى هسلفك ١٠ جنيه تدهوملى ٥٠ جنيه، طب أجيبهم منين؟ ماليش دعوة وإلا متردش فكان الربا فيه ظلم للفقير، ظلم لهذا الضعيف المحتاج، ظلم للفقير، فجت أحكام الربا من أجل العدل مع الفقير

١. يبقى أحكام الطلاق : من أجل العدل مع المرأة
 ٢. أحكام الربا : من أجل العدل مع الفقير
 ٣. أحكام الدم والمال والقصاص : يا جماعة ده لما التار بيقوم بين بلدين كانت الدنيا بتولع، ليه؟ ممكن القبيلة الضعيفة تتباد تماما بسبب إن القبيلة الثانية بتنتقم لمقتل واحد بس، فكان فيه ظلم للضعفاء، طب أنا ذنبى إيه؟ اتقتل ليه؟ ده اللي قتل، أنا اتقتل أنا ليه؟ ظلم للضعيف اللي مش قادر يعمل حاجة، خدوا بالكوا
 ٤. أحكام الميراث كان الورث يكتب للأولاد و البنات يخبطوا راسهم فى الحيط، مالناش دعوة، إحنا هنعط مالنا فى بيت غيرنا ليه؟ البنت دى بكرة تتجوز راجل غريب، أودى بيتى فى بيت رجل غريب، ده الكلام اللي بيتقال إنما أدى بيتى لإبنى اللي شال إسمى، أو أدى فلوسى لأبويا وأمى ليه؟ ما خلا كبروا وعجزوا، أدى فلوسى لولادى اللي شايلين اسمى من بعدى، فكان فيه ظلم للضعيف وظلم للمرأة من خلال الميراث
 ٥. الرشوة : ما انتا رايح للمصلحة الحكومية غلبان راجل فى المرور يقولك فوت علينا بكرة طب مش عارف إيه، يا عم الورق اللي إنت بتقول عليه أصلا انت لازم تعمل ايه، وتروح فىن وتسافر أمريكا وترجع منها على العراق عشان الورقة دى تخلص ! طب تقوم تطلع له ٥ جنيه الموضوع خلص فى ٥ دقائق يبقى فيه ظلم للمحتاج اللي هوا مهوش عارف يعمل، انت صاحب مصلحة وهو بإيده مصلحتك بإذن الله سبحانه وتعالى، يبقى أحكام سورة البقرة إيه؟

العدل
 يبقى الإسلام جاء من أجل إقرار دولة العدل، يبقى لما نبقى عايشين فى أيام الظلم إحنا اللي ظلمة قبل ما نتهم أى حد، إحنا اللي ظلمة يا جماعة، إحنا نفسنا مش مطبقين هذه الأحكام، شوفوا الوقتى ! يعنى إحنا قولنا إمبراح سورة البقرة لن تحاج لواحد ما صاحبهاش مطبقهاش، سورة البقرة هتحتاج لموظف مرتشى؟! سورة البقرة هتحتاج لواحد حاظط فلوسه فى البنك عايش على فؤائد الربا؟! ويقولك اعمل ايه وانت تعمل إيه خلاص متجيش يوم القيامة تقول أنا أعمل إيه؟! سورة البقرة تحاج لواحد معلق مراته بقالها ٣ سنين يقولك أخليها زى البيت الوقف؟! مش ممكن يا جماعة، سورة البقرة تحاج لصاحبها يبقى إذا الإسلام جاء من أجل إقرار دولة العدل، عشان كدة

ابن تيمية قال: "إن الله يقيم دولة العدل ولو كانت كافرة" زى أمريكا "ولا يقيم دولة الظلم و لو كانت مسلمة" يبقى الإسلام جاء من أجل إقرار دولة العدل، يبقى الرابط ما بين الأحكام دى إيه؟ الرابط العدل، إن إحنا بنقى دولة عادلة، الشبهة اللي بعد كدة بيقولوها أو الشبهة الأخيرة ليهم فى الكلام يقولك إيه؟ يقولك طب ماشى بس فيه حاجات غريبة بتيجى وسط الأماكن الغربية، قصدك إيه؟ يعنى تلاقى مثلا الكلام ماشى عن رمضان والصيام فجاءة كدة تلاقى قامت داخله آية "وَإِذَا سَأَلَكَ عِبَادِي عَنِّي فَإِنِّي قَرِيبٌ أُجِيبُ دَعْوَةَ الدَّاعِ إِذَا دَعَانِ فَلْيَسْتَجِيبُوا لِي وَلْيُؤْمِنُوا بِي لَعَلَّهُمْ يَرْشُدُونَ" البقرة: ١٨٦ آية عن الدعاء، وبعد آية الدعاء نرجع تانى للصيام ما إحنا كنا بنكلم عن الصيام إيه اللي دخلنا؟ أو تلاقى مثلا آية بتكلم عن القتال يعنى زى قول الله سبحانه وتعالى "أَمْ حَسِبْتُمْ أَنْ تُدْخَلُوا الْجَنَّةَ وَلَمَّا يَأْتِكُمْ مَثَلُ الَّذِينَ خَلَوْا مِنْ قَبْلِكُمْ مَسَّتْهُمُ الْبَأْسَاءُ وَالضَّرَاءُ وَوَزِلْوْا" بعدها على طول تلاقى الآيات "يَسْأَلُونَكَ مَاذَا يُنْفِقُونَ قُلْ مَا أَنْفَقْتُمْ مِنْ خَيْرٍ فَلِلْوَالِدَيْنِ وَالْأَقْرَبِينَ وَالْيَتَامَى وَالْمَسَاكِينِ وَابْنِ السَّبِيلِ وَمَا تَفْعَلُوا مِنْ خَيْرٍ فَإِنَّ اللَّهَ بِهِ عَلِيمٌ" البقرة: ٢١٥ وبعد كدة "كُتِبَ عَلَيْكُمُ الْقِتَالُ وَهُوَ كُرْهٌ لَكُمْ وَعَسَى أَنْ تَكْرَهُوا شَيْئًا وَهُوَ خَيْرٌ لَكُمْ وَعَسَى أَنْ تُحِبُّوا شَيْئًا وَهُوَ شَرٌّ لَكُمْ وَاللَّهُ يَعْلَمُ وَأَنْتُمْ لَا تَعْلَمُونَ" البقرة: ٢١٦ طيب إحنا بنتكلم عن القتال، إيه اللي يجيب آية الإنفاق وبر الوالدين والأقربين فى النص؟ طب إحنا كنا بنتكلم عن قتال المشركين "وَبَشِّرِ الصَّابِرِينَ * الَّذِينَ إِذَا أَصَابَتْهُمُ مُصِيبَةٌ قَالُوا إِنَّا لِلَّهِ وَإِنَّا إِلَيْهِ رَاجِعُونَ" البقرة: ١٥٥: ١٥٦ الاقى فجاءة "إِنَّ الصَّفَا وَالْمَرْوَةَ مِنْ شَعَائِرِ اللَّهِ فَمَنْ حَجَّ الْبَيْتَ أَوْ اعْتَمَرَ فَلَا جُنَاحَ عَلَيْهِ أَنْ يَطَّوَّفَ بِهِمَا وَمَنْ تَطَوَّعَ خَيْرًا فَإِنَّ اللَّهَ شَاكِرٌ عَلِيمٌ" البقرة: ١٥٨ آية من وسط آيات الحج فى مكان أنا مش فاهم أى علاقة ما بينها وبين اللي قبلها واللى بعدها، إيه الحكمة؟ يا جماعة القران من ضمن إعجازه إنه احيانا يجيب آية ورا آية فتقوم تقف وتقول ياربى إيه علاقه الآيه دى بالآيه دى؟ لما تيجى تدبر توصل لمعاني جميلة لدرجة إنك تفهم إن القرآن يقول معاني مانطقش فيها لفظ واحد

لما كنا فى درس فرسان رمضان اكلمنا فى سورة يونس "وَمَا تَكُونُ فِي شَأْنٍ وَمَا تَتْلُو مِنْهُ مِنْ قُرْآنٍ وَلَا تَعْمَلُونَ مِنْ عَمَلٍ إِلَّا كُنَّا عَلَيْكُمْ شُهُودًا" يونس: ٦١ انتم متراقبين، يبقى خد بالك إنك مراقب، الآيه اللي بعدها "أَلَا إِنَّ أَوْلِيَاءَ اللَّهِ لَا خَوْفَ عَلَيْهِمْ وَلَا هُمْ يَحْزَنُونَ" يونس: ٦٢ يعنى إيه؟ كأن ربنا هنا بيقولك إن أولياء الله هم أهل المراقبة، يبقى دى تيجى بعد دى عشان ربنا يعرفك إن طريقة الولاية إنك تبقى من أهل المراقبة، هوا ده اللي أنا قصدى عليه إن احيانا القران يجيب حاجات زى دى عشان يوصلك معاني لم ينطق فيها لفظ واحد

طيب اللي إحنا بنقوله اسمع معايا الآيات دى، قال تعالى: "كَمَا أَرْسَلْنَا فِيكُمْ رَسُولًا مِنْكُمْ يَتْلُو عَلَيْكُمْ آيَاتِنَا" البقرة: ١٥١ يبقى القرآن بعد كدة التزكية عايز قلبك ينصف؟ عايز تتغسل من جوة؟ القرآن هوا الطريق، القرآن جه قبل التزكية لأن القرآن طريق التزكية "وَيُزَكِّيكُمْ وَيُعَلِّمُكُمُ الْكِتَابَ وَالْحِكْمَةَ وَيُعَلِّمُكُم مَّا لَمْ تَكُونُوا تَعْلَمُونَ" البقرة: ١٥١ يارب انت جبت "وَيُزَكِّيكُمْ" قبل "وَيُعَلِّمُكُم"؟ لأن إصلاح القلب قبل طلب العلم، إصلاح القلب أولا، التزكية أولا، فكأن ربنا بيقولك صلح قلبك نصف قلبك "وَيُزَكِّيكُمْ وَيُعَلِّمُكُمُ الْكِتَابَ وَالْحِكْمَةَ وَيُعَلِّمُكُم مَّا لَمْ تَكُونُوا تَعْلَمُونَ" * فَادْكُرُونِي أَدْكُمْكُمْ " عبادة الذكر "وَاشْكُرُوا لِي وَلَا تَكْفُرُونِ * يَا أَيُّهَا الَّذِينَ آمَنُوا اسْتَعِينُوا بِالصَّبْرِ وَالصَّلَاةِ إِنَّ اللَّهَ مَعَ الصَّابِرِينَ" البقرة: ١٥١: ١٥٢ يبقى الذكر والصلاة، يبقى دى العبادات و كأن ربنا يقول نظف نفسك بإيه؟ بالقرآن

والعبادات، طيب بعد ما نضفت نفسك بالقرآن والعبادات، خدوا بالكم يا جماعة فيه سؤال سؤال عايز أسأله لكم **"فَادْكُرُونِي أَذْكَرُكُمْ وَاشْكُرُوا لِي وَلَا تَكْفُرُونِ * يَا أَيُّهَا الَّذِينَ آمَنُوا اسْتَعِينُوا بِالصَّبْرِ وَالصَّلَاةِ"** ميفكر كوش بدعاء من أدعية النبي صلى الله عليه وسلم : **"اللهم أعني على ذكرك"** **"فَادْكُرُونِي أَذْكَرُكُمْ"** **"وشكرك"** **"وَاشْكُرُوا لِي وَلَا تَكْفُرُونِ"** **"وحسن عبادتك"** صحيح **"اسْتَعِينُوا بِالصَّبْرِ وَالصَّلَاةِ"** يعني حتى أدعية النبي صلى الله عليه وسلم جاية من القرآن، شافين يا جماعة أد إيه كان القرآن بيمتج بقلوبهم لدرجة إيه ! إنك لو جيت أى كلمة من كلمات النبي صلى الله عليه وسلم هتلاقى أصل ليها في القرآن، ناس كانت كذلك كانت عايشة بالقرآن، الصحابة كذلك وراء النبي عليه الصلاة والسلام، ناس كلامها قرآن من غير ما تحس ومن غير ما تعرف من كتر ما قلوبها شربت القرآن ومن كتر ما قلوبها شربت كلام ربنا، ومن كتر ما عاشوا مع كلام ربنا سبحانه وتعالى

فيجي بعد العبادات **"وَلَا تَقُولُوا لِمَنْ يُقْتَلُ فِي سَبِيلِ اللَّهِ أَمْوَاتٌ بَلْ أَحْيَاءٌ وَلَكِنْ لَا تَشْعُرُونَ"** البقرة: ١٥٤ بعد العبادة يجي التكليف، لازم تشتغل في الدعوة، تشتغل في القتال، طب لما تشتغل في القتال لازم فيه خسائر، عشان كدة ربنا بيقولب عدها **"وَلَنَبْلُوَنَّكُمْ بِشَيْءٍ مِّنَ الْخَوْفِ وَالْجُوعِ وَنَقْصٍ مِّنَ الْأَمْوَالِ وَالْأَنْفُسِ وَالثَّمَرَاتِ وَبَشِّرِ الصَّابِرِينَ الَّذِينَ إِذَا أَصَابَتْهُمُ مُصِيبَةٌ قَالُوا إِنَّا لِلَّهِ وَإِنَّا إِلَيْهِ رَاغِبُونَ"** البقرة: ١٥٥ لو بسبب دينك ابتليت في أى حاجة من دينتك، لو بسبب توضيحاتك من أجل دينك، أو شغلك من أجل دينك أو دعوتك من أجل دينك ابتليت في أى حاجة في دينتك تقول **"إِنَّا لِلَّهِ وَإِنَّا إِلَيْهِ رَاغِبُونَ"** يعني إيه؟ يعني أنا بتاعك يارب، أنا ملكك يارب، أنا وهبت كلى ليك يارب، أنا لو اتاخذ منى دراع لسة الدراع التاني وقت ماتريد إنك تاخده خده منى، ولو خدت منى دراعين لسة لى رجلين وقت ما تشأ إنك تاخدهم خدهم، ولو خدت جزء من مالى لسة مالى كله ملكك برضه وقت ما تشأ تاخده تاخده، أنا بعث نفسى ليك يارب **"إِنَّا لِلَّهِ"** إحنا بتوع ربنا يا جماعة **"إِنَّا لِلَّهِ"** إحنا عايزين نطلع بيها من الجزء ده، إنا بتاع ربنا، اللى ربنا يشاء يعمله فيك تعمله، اللى ربنا يشاء إنه ياخده منك ياخده، اللى ربنا يشاء إنه يديه لك يديه لك **"إِنَّا لِلَّهِ"** ثمرة معرفة الله **"وَإِنَّا إِلَيْهِ رَاغِبُونَ"** في الدار الآخرة على يمين الجنة وعلى يسارك النار، يعني أهل اليمين وأهل الشمال يبقى الدار الآخرة، يبقى الشعورين اللى إنت ممكن تطلع بيهم لأعلى عليين معرفة الله ومعرفة الدار الآخرة، اللى صبر الناس دى على اللى حصل لها معرفة الله ومعرفة الدار الآخرة، عشان كدة لما تسمع في التراويح آيات جنة وآيات نار ركز أوى، أو آيات عن عظمة ربنا ركز أوى الإيتين دول لو دخلوا في قلبك ابشر إنك انت إن شاء الله من الصادقين **"أُولَئِكَ"** أهل الرفعة دول **"عَلَيْهِمْ صَلَوَاتٌ مِّن رَّبِّهِمْ"** ده مش انت اللى بتطلب صلة الملك، ده الملك هو اللى بيوصلك ! الملك هو اللى بيقربك، الملك هو اللى هيوصل لك طريقك إليه **"وَرَحْمَةً وَأُولَئِكَ هُمُ الْمُهْتَدُونَ"**

الـ
بـ
قـ
رورة: ١٥٦
"إِنَّ الصَّفَا وَالْمَرْوَةَ مِن شَعَائِرِ اللَّهِ" البقرة: ١٥٧ إحنا كنا بنتكلم عن قتال المشركين والخسائر اللى حصلت لنا من قتال المشركين والصبر اللى إحنا صابرينه، إيه اللى دخلنا **"إِنَّ الصَّفَا وَالْمَرْوَةَ مِن شَعَائِرِ اللَّهِ"** طيب شوف الآية اللى بعدها، والآيات اللى قبلها قتال المشركين، الآيات اللى بعدها دعوة المشركين اللى منها قول الله سبحانه وتعالى **"وَمَنْ النَّاسِ مَنْ يَتَّخِذُ مِن دُونِ اللَّهِ أَنْدَادًا يُحِبُّوهُمْ كَحُبِّ اللَّهِ وَالَّذِينَ آمَنُوا أَشَدُّ حُبًّا لِلَّهِ"** البقرة: ١٦٥ حب الله سبحانه وتعالى اللى من ثماره لما الرسول صلى الله عليه وسلم قال : **"ورجل قلبه معلق بالمساجد"** صحيح طب اشمعنى

المساجد؟ من أحد اللفتات الجميلة أوى اللي الواحد سمعها إنه يقولك إن إنتا لما تقابل اللي إنت بتحبه في مكان المكان ده يبقى محب لقلبك طول عمرك وبتفضل تفتكر المكان ده وتحبه فالمكان ده، المكان اللي إنت بتقابل فيه مولك الملك هو المسجد عشان كدة قلبك بيتعلق بيه، من كتر حبك لله بتحب المكان اللي إنت بتقابل فيه الله سبحانه وتعالى

يبقى "إِنَّ الصِّفَا وَالْمَرْوَةَ" جت قبلها آيات قتال المشركين وبعدها آيات دعوة المشركين، فهمتوا يا جماعة الآية دى حكمتها إيه والا لسة؟ "إِنَّ الصِّفَا وَالْمَرْوَةَ مِنْ شَعَائِرِ اللَّهِ فَمَنْ حَجَّ الْبَيْتَ أَوْ اعْتَمَرَ فَلَا جُنَاحَ عَلَيْهِ أَنْ يَطَّوَّفَ بِهِمَا وَمَنْ تَطَوَّعَ خَيْرًا فَإِنَّ اللَّهَ شَاكِرٌ عَلِيمٌ" يارب إحنا عايزين نروح نلحج ونعتمر، طب لازم نسعى بين الصفا والمروة طب الصفا والمروة عليهم أصنام المشركين، طب لو أنا سعيت عليهم وعليهم أصنام المشركين يبقى أنا كدة بشوف رمز شرك وبسكت عليه ولا إيه؟ "فَمَنْ حَجَّ الْبَيْتَ أَوْ اعْتَمَرَ فَلَا جُنَاحَ عَلَيْهِ أَنْ يَطَّوَّفَ بِهِمَا" يعنى لو انت بتسعى على الصفى والمروة حتى لو الأصنام موجوده ملكش دعوة، إنت بتسعى لأجل الله، طب إيه اللي خلى الآية دى تيجى وسط الآيات دى؟ إن إزاي أروح أسعى وحواليا يميني وشمالى أصنام المشركين وأنا بيني وبينهم الآية اللي قبلها جهاد المشركين، والآية اللي بعدها دعوة المشركين وتهديد لهم بالخلود في جهنم لو مستجبوش في الدعوة كأن ربنا بيأصل هنا مبدأ خطير جدا يا جماعة إن الحق حق، أى مكان الحق ده عند مين، الخير خير أيا ما كان الخير عند مين، الوقتى الصفا والمروة السعى بينه عبادة والا مش عبادة؟ حق والا مش حق؟ حق يبقى يتعمل، بس ده المشركين بيعملوه، والمشركين حاطين أصنامهم، ملكش دعوة، لو كل حق تركته لأن أهل الباطل اللي انت بتكرهم وبتعاديهم بيعملوه يبقى إن شاء الله هنسيب تلت تربيع الإسلام بعد بكرة، لية؟ فهمتوا يا جماعة المغزى من هذا الأمر ممكن تكون الآيات صعبة شوية ولكن المغزى فيها عميق جدا إن الحق حق حتى لو كان عند اللي انت بتكرهه تعمله برضه، من كرهنا في المشركين مش عايزين نعمل حاجة بيعملوها ولا عايزين نعمل حاجة حاطين أصنامهم عليها... لأ... دى عبادة تعملها لله سبحانه وتعالى وحت وسط آيات جهاد المشركين، دعوة المشركين، عشان كأن ربنا يقولك حتى لو بينك وبينهم دم لو عندهم حق تعمله، لو الحق حاطين عليه أنام ملكش دعوة بالأصنام وتنطلق إنت إلى تنفيذ الحق اللي إنت أمرك الله سبحانه وتعالى به

إمال آيه الدعاء جاية وسط آيات الصوم ليه "وَإِذَا سَأَلَكَ عِبَادِي عَنِّي فَإِنِّي قَرِيبٌ أُجِيبُ دَعْوَةَ الدَّاعِ إِذَا دَعَانِ فَلْيَسْتَجِيبُوا لِي وَلْيُؤْمِنُوا بِي لَعَلَّهُمْ يَرْشُدُونَ" البقرة: ١٨٦ الآية اللي قبلها "شَهْرَ رَمَضَانَ الَّذِي أُنزِلَ فِيهِ الْقُرْآنُ هُدًى لِّلنَّاسِ وَبَيِّنَاتٍ مِّنَ الْهُدَى وَالْفُرْقَانِ فَمَن شَهِدَ مِنْكُمُ الشَّهْرَ فَلْيَصُمْهُ وَمَن كَانَ مَرِيضًا أَوْ عَلَى سَفَرٍ فَعِدَّةٌ مِّنْ أَيَّامٍ أُخَرَ يُرِيدُ اللَّهُ بِكُمُ الْيُسْرَ وَلَا يُرِيدُ بِكُمُ الْعُسْرَ وَلِتُكْمِلُوا الْعِدَّةَ وَلِتُكَبِّرُوا اللَّهَ عَلَىٰ مَا هَدَاكُم وَلَعَلَّكُمْ تَشْكُرُونَ" البقرة: ١٨٥ أحكام نهار رمضان، طب الآية اللي بعدها "أَحِلَّ لَكُم لَيْلَةُ الصِّيَامِ الرَّفَثُ إِلَىٰ نِسَائِكُمْ هُنَّ لِيَّاسٌ لَّكُم وَأَنْتُمْ لِيَّاسٌ لَّهُنَّ عَلِيمٌ اللَّهُ أَنْكُمُ كُنْتُمْ تَخْتَانُونَ أَنْفُسَكُمْ فَتَابَ عَلَيْكُمْ وَعَفَا عَنْكُمْ" أحكام ليل رمضان، يبقى آية الدعاء جه قبلها أحكام نهار رمضان وبعدها أحكام ليل رمضان، كأن ربنا يقولك إن أخطر وقت لإجابة للدعاء؟ الوقت اللي ما بين الليل والنهار، اللي هوا الوقت اللي قبيل الفطر، واللى هوا لحظة الفطر، زى من أجمل أوقات إجابة الدعاء و أفضل أوقات الدعاء في الصلاة إمتى؟ قبل ما تسلم على اليمين والشمال،

اللى هو الوقت الآخراى، وبعد ما تسلم على طول الوقت الآخراى، وكذلك فى الصيام، دى إشاره أن آيه الدعاء جت وسط آيات الصيام، مش وسط آيات الحج، كأن ربنا بيقولك إن الصيام بالذات اوعى تصوم وما تجتهدش فى الدعاء، اوعى تضيع فرصة الإجتهد فى الدعاء وسط الصوم بالذات لأنه العبادة الوحيدة اللى الإخلاص فيها ١٠٠ من ١٠٠ فإن شاء الله مقبولة، مقبولة عند الله سبحانه وتعالى، عشان كدة تيجى وسط آيات النهار وآيات الليل كأن ربنا كمان بيرشدك إن الصيام مش بس أحسن عبادة ... لأ... فى الدعاء يعنى لو ليك حاجة عند ربنا صوم يوم نفل كدة وإدعى وكمان ما بين الليل والنهار أفضل وقت فى الدعاء

النقطة الأخيرة فى مسألة المواضع فى قول الله سبحانه وتعالى **"أَمْ حَسِبْتُمْ أَنْ تَدْخُلُوا الْجَنَّةَ"** فعازين نركز فى الكلام ده أوى، انت الوقتى هتطلع من الكلام ده والله العظيم الكلام ده كنوز يا جماعة، الكلام ده الواحد بقاله كام سنة ياخذ من بق ده حاجة، ومن كتاب ده حاجة، وربنا يفتح عليك بحاجة، تقرأ فى التفسير ده حاجة، لغاية ما الكلام ده على أد فهمك ليه على أد مقامك عند الله، وعلى أد فهمك ليه على أد ما تصلح وتبقى مصلح بعدكدة، أنا كان نفسى السلسلة دى نسميها معهد إعداد الدعاة، ليه معهد إعداد الدعاة؟ لأن اللى عازب يبقى داعية فعلا يفهم القرآن، لو فهمت القرآن ربنا يفتح عليك كل حاجة بعد كدة، إنما الأول إفهم كلام ربنا، عشان تقدر إنك إنت تبقى فاهم حتى، تبقى راجل عن فهم، دلوقتى الملتزم بتلاقيه مربي دقنه ويجى حد يكلمه بره ميعرفش يقوله كلمتين على بعض ! ما هوا مهواش فاهم دينه، مهواش فاهم إزاي يدافع عن دينه، عازين نفهم ديننا يا جماعة عشان لا نقع فى فخ التسيب اللى دعاة الفضائيات وقعوا فيه ولا نقع فى فخ التشدد اللى البعض وقع فيه، عازين نبقى ناس متوازيين، عازين نبقى ناس أهل توازن، إزاي نجيب التوازن؟ إن إحنا نفهم القرآن، هيخليك إنسان متوازن بين الدين والدنيا، هيخليك إنسان متوازن ما بين تعلق القلب بالله والأخذ بالأسباب، هيخليك إنسان متوازن ما بين شغلك فى الدراسة وجهدك فى الدعوة وإصلاح القلب، هيخليك إنسان متوازن فى كل حاجة فى حياتك فلازم إن إحنا نجتهد فى علاقتنا بالقرآن، عشان كدة تلاقى ربنا سبحانه وتعالى يقول **"أَمْ حَسِبْتُمْ أَنْ تَدْخُلُوا الْجَنَّةَ وَلَمَّا يَأْتِكُمْ مَثَلُ الَّذِينَ خَلَوْا مِنْ قَبْلِكُمْ مَسْتَهْتِمُ الْبُأْسَاءِ وَالصَّرَاءِ وَزُلْزَلُوا حَتَّى يَقُولَ الرَّسُولُ وَالَّذِينَ آمَنُوا مَعَهُ" أبو بكر وعمر "مَنْ نَصَرَ اللَّهَ آلاَ إِنَّ نَصَرَ اللَّهُ قَرِيبٌ"** البقرة: ٢١٤ يبقى الآية دى بتتكلم عن القتال الآية اللى بعدها **"يَسْأَلُونَكَ مَاذَا يُنْفِقُونَ قُلْ مَا أَنْفَقْتُمْ مِنْ خَيْرٍ فَلِللَّهِ وَالَّذِينَ الْأَقْرَبِينَ وَالْيَتَامَى وَالْمَسَاكِينِ وَابْنِ السَّبِيلِ وَمَا تَفْعَلُوا مِنْ خَيْرٍ فَإِنَّ اللَّهَ بِهِ عَلِيمٌ"** البقرة: ٢١٥ الآية اللى بعدها **"كُتِبَ عَلَيْكُمُ الْقِتَالُ وَهُوَ كُرْهٌ لَكُمْ وَعَسَى أَنْ تَكْرَهُوا شَيْئًا وَهُوَ خَيْرٌ لَكُمْ وَعَسَى أَنْ تُحِبُّوا شَيْئًا وَهُوَ شَرٌّ لَكُمْ وَاللَّهُ يَعْلَمُ وَأَنْتُمْ لَا تَعْلَمُونَ"** البقرة: ٢١٦ آية اللى خلى آيات القتال تيجى وسط آيات الإنفاق؟ واحد هيرفع إيدو ويقولى أنا عارف ليه؟ لإنك إنت قولت من شوية إن القتال مينفعش من غير إنفاق، جزاك الله خيرا، ولكن الإنفاق اللى هنا ده إنفاق لأبوك وأمك، والفقير واللى مادد لك إيدو يشحت، واليتيم والمسكين، مهواش إنفاق للجهاد، إيه اللى خلى نوع الإنفاق يجى وسط ده؟ عشان حاجتين مهمين جدا يا جماعة :

١ . بعض الملتزمين احيانا بهتموا بجانب معين فى الدين، والجانب ده يتضخم الإهتمام بيه جدا عنده لغاية ما ينسى باقى الدين كله يعنى تلاقى الأخ مثلا مهتم بالدعوة وعشان اهتمامه بالدعوة ضيع العبادة ! وعشان إهتمامه بالدعوة ضيع

العلم ! وعشان إهتمامه بالدعوة ضيع بر الوالدين ! وعشان إهتمامه بالدعوة ضيع صلة الرحم ! تلاقي من كتر إهتمامه بالحاجة ضيع كل حاجة !

٢. واحد تاني مهتم بقلبه علشان اهتامه بقلبه ضيع ...، ربنا جاب حكم الإنفاق وصنائع المعروف والجري على حوائج المحتاجين وسط آيات قتال الأعداء عشان كأنه يقولك اوعى وانت بتجاهد في سبيل دينك تنشغل عن باقي أمور الدين اللي هيا أقل منها في الشوط، فهمتوا الرسالة؟ يبقى ربنا كأنه يقولك خد الدين بشموليته، طبق الدين كله، اوعى جزئية من الدين تنسيك باقي الجزئيات

الرساله الثانية اللي إحنا عايزين نختم بيها، إن في غزوة الأحزاب المسلمين هاجروا من مكة والناس خرجت عشان تستقبل الرسول صلى الله عليه وسلم والصحابة، يعني إذا المدينة فرحانة؟ آه هل كل أهل المدينة كانوا فرحانين بقدوم الرسول عليه أفضل الصلاة والسلام؟ معظمهم، ولكن يا جماعة دائما يبقى في وسط المجتمع ناس مهياش حاملة لقضية الدين، يعني إيه؟ يعني الرسول صلى الله عليه وسلم جه والصحابة جم نسقف وفرحانين، ولكن أول ما نلاقي الأحزاب محوطانا وعيالنا مش لاقية تاكل وستاتنا هتسبى مننا، إسلام إيه ده والمصايب اللي جت علينا منين؟ فيبدأ الفئات ضعيفة العقيدة تتضرر من وجود الدين في المجتمع ليه؟ لأن الدين بيتحارب، لما الدولة الإسلامية تقوم في بلد من بلاد الإسلام هيتعمل حصار إقتصادي وهيتعمل تنديد وهيحصل مشاكل، فالفئات ضعيفة العقيدة تطلع هنا وتقول إحنا ذنبا إيه؟ إنتوا جيتوا لنا منين؟ إحنا كنا عايشين مسترحين، فرينا كأنه يقولك اوعى حد في المجتمع يتضرر بسبب وجودك فيه، يعني إنت بتقاتل أهو في ناس في المجتمع ملهاش دعوة بيك طلع من جيبيك جزء عشان تحارب بيه أعدائك وجزء عشان تطعم بيه هذه الفئات، عشان ما فيش حد في المجتمع يتضرر بسبب وجودك، طب إحنا الوقتي مبنقاتلش، إحنا الوقتي بندعو إلى الله يبقى الرسالة بتاعتنا أوعى حد يتضرر من شغلك في الدعوة، أوعوا يا جماعة، عايزين يا جماعة نعمل في سلام، عايزين يا جماعة ندعو إلى الله في سلام، يعني كلمه جميلة أوى سمعتها من أحد الناس في المسجد هنا يقول الملتمزم ده المفروض يكون زى جنينة الفل، الجنينة اللي مزروعة فل أى حد يعد جنبها يشمها يقول الله ويبقى مش عايز يمشى من جنبها، عايز يبقى جنبها كدة، إحنا عايزين نكون كدة يا جماعة، عايزين نبقي حاجة ربحتها حلو أوى وطعمها حلو أوى وشكلها حلو أوى، أى حد يشوفنا أيوة أنا عايز أبقى كدة زيكوا الله يخليكوا، هو ده الدين، الناس اللي وشها من منور، الناس اللي بتعبد ربنا ومجتهدة في العبادة، الناس اللي أخلاقها عالية تجرى في خدمات زمايلها وخدمات الآخرين، وفي نفس الوقت بتذاكر وبتجتهد في المذاكرة، وفي نفس الوقت بتشتغل في الدعوة، ورجالة شايلة مسئولية الدين، مضحيش أبدا بإذن هي تنصر دينها مهما كانت هتتعب أو هتضحى، عايزين النموذج الجميل ده، عايزين نموذج أى حد يشوفه يقول الدين ده جميل أوى والإلتزام ده جميل أوى، لو وسط الأعدة دا هي ٢٠ واحد طلوعوا كدة ممكن الإلتزام في المنصورة في تلت أربع سنين يطغى على المنصورة كلها لما النموذج الجميل ده يتكون، مش عايزين حد يتضرر من وجودنا يا جماعة، مش عايزين حد يتأذى مننا، مش عايزين النظرات النارية للعصاة، مش عايزين كلمات السخرية والتريقة للي بيعصوا ربنا، مش عايزين لما نشوف واحدة متبرجة تقوم بصصلها كدة وتقول الله يلعنك، الكلام الغريب اللي بعض الشباب بيعملوه، مش عايزين الحاجات دى يا جماعة، عايزين ندعو إلى الله في سلام، ندعو إلى الله وإحنا بنكسب في كل خطوة بنخطوها مزيد من حب الناس ومزيد من كسب الناس ومزيد من تعاطف الناس

ومزيد من إحترام الناس ومزيد من إعتراف الناس إن إحنا فعلا تمثيل للإسلام، مش الإسلام في القرآن مقبول عليه؟ وإحنا في الواقع ناس ملناش دعوة بديننا ! فهمتوا يا جماعة؟ يبقى إذا الجزء التاني بيكلم عن الأحكام والنهارة كان فيه مفاهيم مهمة جدا زي مفهوم الشمولية زي مفهوم إعجاز القرآن ومفهوم الترابط، زي مفهوم العدل، زي مفهوم إن إحنا نبقي نفحة رحمة على المجتمع اللي إحنا فيه، زي مفهوم الملتزم المثالي أو النموذجي، زي مفهوم عظمة القرآن وأهمية إن إحنا نفهم القرآن، كل دى مفاهيم كنا بنحاول نركز عليها في هذا الدرس

أقول قولى هذا واستغفر الله لى ولكم، اللهم فقهننا بالقرآن، اللهم اجعل القرآن العظيم ربيع قلوبنا ونور أبصارنا وجلاء أحزاننا وذهاب همومنا وغمومنا، اللهم ارزقنا حفظ القرآن، واللهم ارزقنا فهم القرآن، واللهم ارزقنا العمل بالقرآن اللهم ارزقنا حب القرآن اللهم ارزقنا فى هذا الشهر تلاوة القرآن آناء الليل وآناء النهار على الوجه الذى يرضيك عنا، اللهم حببنا فى القرآن، اللهم اشرح صدورنا للقرآن، اهدنا بالقرآن، أصلحنا بالقرآن، أصلح قلوبنا بالقرآن، اهدى الشباب ببركة القرآن يارب العالمين، اللهم ارزقنا الخشوع، اللهم ارزقنا الإنكسار بين يديك، اللهم ارزقنا الإفتقار إليك برحمتك يا أرحم الراحمين

سبحانك اللهم وبحمدك أشهد أن لا إله إلا الله أستغفرك واتوب اليك

تم بحمد الله

شاهدوا الدرس للنشر على النت فى قسم [تفريغ الدروس فى منتديات الطريق إلى الله تفضلوا هنا :](#)

<http://forums.way2allah.com/forumdisplay.php?f=36>